

lis Gnovis

■ **VIGNESIE.** Zanussi
«Premi Bresson»

Il president de Bienâl di Vignésie, Roberto Cicutto, il diretôr di «Famiglia Cristiana», pre' Stefano Stimamiglio, e il president de Fondazion «Ente dello



Spettacolo», monsignôr Davide Milani, ai 2 di Setembar, i àn consegnât a Krzysztof Zanussi il «Premio Bresson alla carriera». Sfi di un emigrant di Cjstiel di Davian rivât in Polonie dal 1843, il regjissêr al è nassût a Varsavie, vie pal 1939. Ritirant il ricognossiment, Zanussi al à declarât: «Pe religjon cristiane, l'invenzion di Gutenberg e je stade une rivoluzion, ma il contignût nol è mudât, e je mudade la forme di espression. In zornade di vuê, l'imagin i à dât la volte a la peraule e dunce la Glesie e varès di cjapà une decision coletive par aumentà l'audiovisif, ch'al è il lengaç de nestre ete».

■ **GLEMONE.** La profezie dai puars

«Ducj a puedin fâ alc. Al dipent d'indulà che si stabilis i confins dal mont. Si po stabiliju drenti di se. Si po stabiliju tal nestri grop (famee, partît, gjernazie, país). Si po butà jù ogni confin: in chê volte, ogni om al devente gno fradi»: al è chel chi un passaç decisif te opare «La profezia della povertà», ch'è je tornade tes librariis, 25 agns dopo de sô publicazion, di chê strade dal cincuantèsim de «Caritas Italiana». Il libri, tornât a stampâ des «Edizioni San Paolo», al proferis un'interviste, curade dal gjornalist di «L'Osservatore Romano» Gaetano Vallini, cun monsignôr Giovanni Nervo, il prin president dal organisim caritatif de Glesie taliane e un dai protagoniscj de rinassince dal Friûl, daspò dal taramot dal 1976, in grazie de sô colaborazion cun monsignôr Alfredo Battisti, massime te animazion dai zimulaments fra lis Comunitâts taramotadis e lis Glesias talianis.

■ **CLAUT.** Confront su la speleologjie

Ai 24 e ai 25 di Setembar, i grops e lis clapis speleologjichis de Patrie e di Triest si dan dongje a Claut pe convigne «Speleo2022». Tai intindiments de Federazion speleologjiche regionâl (www.fsrfvg.it/), l'apontament al permetarà un confront fra ducj i operadôrs dal setôr ma ancje di fâur cognossi a lis Comunitâts furlanis e triestinis i risultâts des esplorazions e dai scandais sientifics tal mont soterani regionâl. L'abitance de convigne e sarà li de sale polifunzionâl dal ambient «Dolomiti», dulà che si podarà rimirà ancje la mostre fotografiche «Le grotte e l'acqua».

■ **UDIN.** Zoventût e justizie climatiche

I grops di Gurize, di Udin e de Cjargne di «Fridays for Future» a son daûr a organizâ il «Sciopar globâl pe Clime», ch'al tornarà vinars ai 23 di Setembar (https://fridaysforfutureitalia.it/23-settembre-2022-sciopero-globale-per-il-clima/). In Italie, al colarà juste doi dîs prin des votazions politichis. Sul apontament eleorâl, i zovins ambientalscj a son intervignûts proponint une «Agenda climatica» in 5 ponts (transpuarts e mobilitât; energjie; lavôr; edilizie e miserie energjetiche; aghe), dulà ch'a tornin a ribati che l'unic program pussibil al è chel climatic» (https://fridaysforfutureitalia.it/lagenda-climatica/).

Miercus 14 Glorificazion de Sante Crôs

Joibe 15 La Madone Dolorade

Vinars 16 S. tis Vergjinis di Aquilee

Sabide 17 S. Robert Bellarmino

Domenie 18 XXV Domenie vie pal an

Lunis 19 S. Zenâr

Martars 20 S. Eustachi

Il timp Bjel timp



Il soreli
Ai 14 al jeve aes 6.44
e al va a mont aes 19.21.



La lune
Ai 17 Ultin cuart.

Il proverbi
Fin cuant che si vif, simpri s'impare.
Lis voris dal mès
Une vore di plantis a son bielzà secjadis,
gjavitils vie une par une. Cu lis primis plois
a podin tornâ cais e lacais, atenzion.

Inviers de Ecologjie integrâl

E torne la propueste
formative

par Comunitâts e Parochiis

Azions di meti in vore par fâi cuintri a la crisi ecologjiche e climatiche a 'nd è di stierni. La cuistion dal di vuê e je ch'al covente imparât a praticâlis, popolarizantlis e dantjur une struture salde.

E partûs di chest assum l'organizazion dal secont «Cors di formazion par Comunitâts e Parochiis inviers da l'Ecologjie integrâl», ch'al comence tal mès di Otubar, di chê strade dal «Timp dal Creât» (1 di Setembar-4 di Otubar), e ch'al larà indevant fintremai tal mès di Zenâr di an cu ven.

L'esperienze didatiche pal 2022 e à par titul: «Messedâsi pe Ecologjie integrâl tes Diocesis e sui teritoris» e po e je compagnade dal sproc: «App(I)-I-Care praticichis e politichis di trasformazion par un svilup sostenibil» (www.focsiv.it/wp-content/uploads/2022/08/brochure-corso-ecologia-integrale-10.08.2022-DEF.pdf). Daûr la ferade de «Setemane social dai Catolics» di Taranto, il percors formatif inmaneât de Federazion dal volontariât internazionâl cristian «Focsiv», de «Caritas» e de Fondazion «Lanza» al presentarà i imprescj necessaris pe culture e pe pratiche coerente de Ecologjie integrâl ch'a son in stât «di promovî leams di Comunitât, di strenzi rêts viertis e inclusivis sui teritoris, di prevignî e di contrastâ la miserie e, in gjenerâl, di acelerâ la transizion inviers di un model di svilup sostenibil, inclusiv e partecipatif».

Il cors al proponarà 6 zornadis di lezioni e di confront «online», ch'a colaran simpri di lunis, di 17.30 a 19.30 (gjavade l'ultime convigne, ch'è començarà a 16.30).

Il telâr dai apontaments al previôt une jentrade, une analisi dal contest, la presentazion di un'esperienze, une indicazion pastorâl e motivazionâl par



Tal mès di Otubar, al tache il secont «Cors inviers da l'Ecologjie integrâl»

Il cors «Focsiv» e «Caritas» par imparâ praticichis e politichis par un svilup sostenibil

inviâ il lavôr par grops e il timp dal confront, destinât ancje a l'elaborazion di propuestis gnovis di azion. Si tacarà ai 10 di Otubar, cui salûts dal president de «Conference episcopâl» Matteo Zuppi e cu la cuistion «Azi pe pàs», ch'è sarâ profundide des relazions di Daniele Taurino dal «Moviment noviolent», di Franco Vaccari di «Rondine Cittadella della pace» e di Rosa Siciliano di «Mosaico di pace». Chês altris lezioni a frontaran i arguments: «Azi pai consums sostenibii (ai 24 di Otubar); «Azi pes Comunitâts energetichis» (ai 7 di Novembar); «Azi par tornâ a tiessi Comunitâts» (ai 21 di Novembar); «Azi pe inclusion (ai 5 di Dicembar); e «Azi cu la comunicazion» (ai 16 di Zenâr dal 2022).

Par cjapâ part al cors, si varà di dâsi in note (mediant dal modul electronic

https://forms.gle/CwCDKhrjWmdAp9tq9) e di paiâ une cuote simbolice di 20 euros.

I coordenadôrs dal percors formatif (ch'al metarà a disposizion dai arlêfs registrazions, diapositivis e documents e che po al sarâ certificât cuntun atestât) a son: Paolo Beccegato e Massimo Pallottino di «Caritas Italiana»; Marta Morgante, Claudia Alongi e Andrea Stocchiero di «Focsiv»; e Matteo Mascia di «Fondazione Lanza».

Fra i imprescj didaticis ufierts, e figure ancje la «Guida per comunità e parrocchie sull'Ecologia Integrale», ch'è je stade prontade di «Focsiv» e che dal 2020 si po discjamâ a gratis da la rêt des rêts (https://lavoro.chiesacattolica.it/guida-per-lecologia-integrale-2020/).

Mario Zili

Tradizions furlanis dal mès par cure di Mario Martinis

LIS CUATRI TIMPORIS

Cun Març, Jugn e Dicembar, Setembar al è il mes des Cuatri Timporis. Lis Cuatri Timporis a jerin un cicli religjôs di trê zornadis di penitence e ringraziament sistemât daprûf la jentrade des cuatri stagjons. Intal miercus, vinars e sabide de lôr setemane il rituâl al proviodeve dizuns, preieris, oparis di caritât e messis che servivin a ringraziâ Diu pes coltivazions, pai bens e pai prodots vûts de tiere. Fin tai agns Sessante dal Nûfcent, in Friûl e jere usance fâ ancje lis cuestuis pes Cuatri Timporis par ricompensâ il predi des messis e dai uficis fats inte particolar ocasion pai muarts, intal sutil leam muart-vite-cicli dal timp-nature-bondance. Chestis antighis praticichis liturgjichis, che a àn resistût fin a cualchi desene di agns indaûr tes zonis agrariis plui decentradis, a rinovavin il crodint tal cuarp (cui dizuns) e tal spirt (cu lis preieris) in coincidence dal cambi



des stagjons, o ben des cuatri fasis di fonde dal cicli agrari (pols, gjerminazion, maturazion e racuete) e cussì a vignivin a jessi pe int de campagne la ocasion di rapuartâsi in maniere gnove ae nature e al timp, al mont e al spirt. Marcant il leam dal om cu la nature, lis Cuatri Timporis a fasin diventâ sacri ancje il transit perpetui des stagjons e in cheste maniere l'om purificât al podede presentâsi gnûf te stagjon gnove. Chescj «cuatri tims sacris stagjonâi», che in Friûl a cjaparin ancje conotazions particulârs peantsi al cult dai muarts (evocâts e preâts tai moments critics e strategjics des fasis stagjonâls), dopo une grande partecipazion des popolazions agrariis durade par secui une vore a lunc, a colarin daurman in crisi tal secont dopovuer dal Nûfcent, in linie cu la prime industrializazion dal Friûl e al lôr stes declassament determinât de riforme liturgjiche dal Concili Vatican II.